


卷十



濟寧州

在府城西六十里

領縣三

後魏置濟州于碯礮城地里志云碯礮古津也城因名之按在今東阿縣南五代周移治鉅野金始徙任城任城漢縣古任國太皞之後左傳任宿須句風姓也實司太皞與有濟之祀是矣元爲濟寧路國初置府後降爲州李翰林集有離濟寧汎舟北行詩楊柳娉婷綠荷花旖旎紅魚遊華蓋底人在鑑湖中大白拈春酒輕衣受晚風龜蒙與鳧嶧只隔片雲東按此則濟寧之名在唐已見○志云太白酒樓在州南城上白客任城令賀知章觴

之于此後人因建樓焉併塑二公像咸通間沈光
有記○南池在城東南二百步泚水所經渟泓入
天井閘爲池蓄荷數畝杜甫與許主簿泛舟南池
秋水通溝洫城隅集小船晚涼看洗馬森木亂鳴
蟬菱熟經時雨蒲荒八月天晨朝降白露遙憶舊
青氈○北河紀云泚筆泉在州東門外舊傳太白
泚筆處明嘉靖五年主事白旆築亭其上崑山吳
擴詩良夜不能寐閒過泚筆泉獨看池上月空憶
酒中仙落魄何爲者高風萬古傳臨流重搔首哀
鴈下江烟○城邑攷云故樊城在州北漢置縣屬

東平國旋廢○邾婁城在州南十里春秋哀六年
城邾瑕杜預注任城亢父縣北邾婁城也志以邾
婁城在州南二十里又二十里爲承匡山舊傳女
媧生處今山下有女媧廟○宣聖墨池在魯橋閘
下俗名硯瓦溝其水色玄距州南六十里有南州
祠以祀仲由又南二十里爲仲家淺○桓公溝源
出州西界四十里崩山下桓宣武遣冠軍將軍毛
彪生鑿此故名○水經注云黃水又東逕任城郡
之亢父縣故城西夏后氏之任國也漢章帝元和
元年別爲任城在北王莽之延就亭也縣有邾亭

春秋邾國見襄十三年後漢郡國志亢父縣有邾亭王莽更之曰順父矣世祖建武二年封劉隆爲侯國其中謂之桓公溝○塚記云漢灌嬰墓在州東三十里魏王粲墓在州南五十三里近亢父城晉何休墓在州北二十里唐任城王李道宗墓在州南二十里俱倚運河兩岸○河志云會通河在州城南元至正間開鑿以通漕運南抵徐州達清河以入于淮北經東昌府之臨清州與衛河合流入于海州境置閘十有二而天井魯橋棗林南陽其最著者沂泗洸汶入漕之泉九十有七而州東之蘆溝泉入南陽閘其旁有托基泉入棗林閘又有馬陵泉入魯橋閘俱境內泉也太白浣筆泉則徑入于漕○東泉志曰自滕縣至此并嶧縣許有濕水二泉及曲阜縣蜈蚣泉共十六泉散入魯橋以下漕河是爲魯橋圈裏派又自嶧陽縣至寧陽界共六十六泉除曲阜蜈蚣泉入魯橋閘寧陽龍港溝以下四泉入分水河餘六十三泉俱入天井閘是爲濟寧天井派蓋沂洸之流來自東北入于天井以資運道牛首之渠來自西南出于魚沛以洩潴水而河漕之利病交相受焉譬之于脉在任

督之交矣○碑目云漢廬江太守范式碑在州治內蔡邕書射戟臺在州南門外相傳呂布射戟援昭烈處臺有古碑○魯橋闢碑取兩城山石爲之兩城者山夾如城也又云在鄒婁亢父二城之間

嘉祥縣

在州城西五十里

古武城境子游絃歌地也漢以後皆屬鉅野金大定年析置嘉祥取西狩獲麟之義河紀云獲麟渡在嘉祥境漕河旁地名大長溝華容孫宜詩渡古寒烟積沙明落照懸春秋悲鳳日天地泣麟年魯變時交阻周衰轍竟旋至今留絕筆真意更誰傳

○志云萌山在縣東北隅峯巒秀拔石如萌芽故名其山出城橫亘四五里又名橫山○縣西六里有小青山南二十里有大青山河紀云在運河西岸卽嘉祥山也高郵汪廣洋舟中望嘉祥山詩放溜數百里悠然纔見山涼風吹雨過好鳥背人還河水翻銀浪岡巒擁翠鬟不知幽谷裏能得幾家閒○縣有山九十九最高者塔山也此山出雲則雨隨至亦在縣南二十里與范山青山相連范山者相傳范巨卿家其下巨卿墓在大鼎山前距此山十里今湮沒墓碑移置州學內諺云大鼎山前

十八塚末末東頭范巨卿○青山據本志在縣西南十五里迤南有焦氏山挾山皆連一脈山陽有法雲禪院院後有法雲泉甚佳山陰有惠濟公廟甚靈應號青山君宋宣和間勅賜今額有漢建寧元年及晉永安年奉車都尉申弘所立碑頌東南有洞深數丈產赤沙可塑神像其洞即曰青山洞山右有普興禪院有泉曰普興泉巖巘幽深泓流紆曲誠一邑之勝也○按塔山下有洞曰紫雲洞紫雲之西有漢太子墓上有石享堂半淤入土石壁刻伏羲以來祥瑞之物及古忠孝故事皆極纖

巧北有漢碑一通頂微露中有一孔文字模糊莫辨相傳為漢太子墓不知所本○郟山在縣東南七里西麓有晉太尉郗鑒墓墓前有石臺二座相去丈許高僅二丈下小上大皆鑿花草之形極頂斗拱細巧石瓦參差乃累石成巨門而中斷者也遠觀若燈臺之狀俗名燈臺山山下有城曰郟城相傳郗鑒所築今為河水墊沒○東卧龍山豐山皆近郟城村以縣西十里有西卧龍故此為東卧龍一名魯翟山豐山在卧龍山前其頂有溝一直深丈餘如器破而未離之狀故以豐名山西有翟

師軻子伯穎先生墓○城冢記云焦城在縣南十五里青山之東周武王封神農後于焦卽此城也宮殿遺址尚存今青山惠濟公廟疑卽焦君其鄉曰焦城村○南武城在縣南四十里魯有二武城此其一也後改爲柯城遺跡尚存其山曰南武山有曾子墓及耘瓜臺劉向說苑云曾子耘瓜誤斷其根曾皙怒擊之卽此處矣○嘉祥舊城金大定間徙于縣治東北之崩山其山巉巖峭拔高百餘仞其前有獨坐山其後有栢山山下有唐薛仁貴墓○縣南三里有澹臺山世傳澹臺滅明家此有

澹臺墓又十五里爲釣魚山山頂有石如釣臺臺旁石竅中有鐵環往來移動輒作聲臺上有巨人跡山之西有晁錯墓又三十里爲平山有秋胡子墓俗傳秋胡妻邵姓貞烈爲神山下居民邵姓者自稱其族云屬戊戌鄉○黃河故道在縣北十里自鉅野入境東達濟寧界入塌場口北有古隄方輿志云馬頰河經于鄆濟卽此河也濟河在縣南五十里平山之西姚河之水入之舊名梧桐堦

鉅野縣 在州西北一百里

水經注云黃水又東逕鉅野縣北漢縣也何承天

曰鉅野湖澤廣大南通洙泗北連清濟舊縣故城正在澤中故欲置戍于此城城之所在則鉅野澤也衍東北出爲大野昔西狩獲麟于是處皇覽曰山陽鉅野縣有肩髀冢重聚大小與闕冢等傳言蚩尤與黃帝戰克之于涿鹿之野身體異處故別葬焉黃水又東逕咸亭北春秋桓七年經書焚咸丘註疏咸丘魯地高平鉅野縣南有咸亭水南卽金鄉縣之東界也有漢荊州刺史李剛墓剛字叔毅山陽高平人熹平元年卒見其碑有石闕祠堂石室三間椽架高丈餘鏤石作椽瓦屋施平天造方井側荷梁柱四壁隱起雕刻爲君臣官屬龜龍螭鳳之文飛禽走獸之象制作工麗不甚傷毀○志云金鄉山在縣南五十里山北石洞曰清涼西征記以漢司隸校尉魯恭鑿山爲塚得白兔不葬更葬山南而得金故名洞深十餘丈內鑿石四小閣閣外一堂陞高三尺堂外兩門門外兩大閣石道長三丈濶十有六尺相傳爲秦始皇避暑宮○黃水卽黃河之支流也黃河有南北二道俱在境內北道由曹州安興界來東北接張秋入運南河卽城東八里河也有新河水注之由嘉祥入運○

鉅野在縣東五里南北三百里東西一百里禹貢
大野既潴爾雅十藪魯有大野是也蚩尤冢在縣
北九里冢高三丈四時民祭多赤氣直衝上天號
蚩尤旗又有麟冢在縣東南三十里哀十四年西
狩獲麟孔子傷之正此處也縣北又有落鳳臺石
高數仞相傳春秋時鳳集于此北門外有蓮花池
花開常並蒂縣東南十里又有卧龍山以形似而
名

鄆城縣

在州西北
百六十里

左傳成十六年晉人執季文子于茗丘公還待於

鄆註疏曰鄆魯西邑故隋大業初置鄆城縣矣亦
唐之鄆州也貞觀八年移州理于須昌此仍爲縣
○志云鄆舊城在縣東南卽隋所築金避水患徙
置盤溝村乃今治也有高魚城在縣東北左傳取
我高魚卽此○寰宇記云獨孤山在縣東北五十
里孤峯獨立故也呂本中詩淒涼匹馬經行處况
是此山名獨孤○濟水故瀆在縣西南二十里折
而東流至縣南八里河環城東北至安山入運又
冷莊河濼河俱自曹州來東北至蕭皮口出境入
壽張○韓憑冢在縣境宋大夫韓憑娶妻美宋康

王奪之使憑運土築青陵臺憑自殺妻陰腐其衣
與王登臺自投臺下左右攬之着手化爲蝶王怒
令憑與妻異塋冢樹自然交柯○五代王彥章字
子明鄆州壽昌人事梁太祖爲人驍勇有力能跣
足履棘行百步持一鐵鎗馳突奮疾如飛軍中號
王鐵鎗宋歐陽脩有觀王彥章鐵鎗記

曹州

在府城西
三百里

領縣二

周武王封曹叔振鐸于此是爲霸國左傳鄆人公
孫疆獲白鴈以獻因以霸說于曹伯陽而不事宋
魯哀公八年宋滅曹後宋爲齊楚魏所滅三分其

地齊得宋之濟陰漢以爲濟陰郡治東北四十里
之定陶故城後魏于定陶城置西兗州周武帝元
年改爲曹州州南百里有山口曹南山卽詩云蒼
兮蔚兮南山朝濟僖十九年盟于曹南者也論衡
曰大山雨天下小山雨一國曹之南山則雨一國
之山也今入州屬曹縣界○寰宇記云左岡在郡
城東北五里岡阜連屬林木交映以近左城故名
相傳春秋左丘明父塋處隋時剏有寶乘塔院宋
錢明逸有重脩塔院記其傍爲漢定陶恭王陵○
按志左城卽古陶丘地爾雅再成爲陶丘成猶重

也注禹貢云陶丘在濟陰定陶西帝王世紀舜陶于河濱是矣九州要記云颺叔氏有裔子董父好龍舜遣豢龍于陶丘是爲豢龍氏今有龍池存濟水西自考城界來東經陶丘禹貢所謂東出于陶丘北又東至于菏也菏水發源州東南三十里之菏山卽禹貢之菏澤也濟水會此入海爾雅曰濟別爲濳呂忱曰水決復入爲汜今州西南三十里有汜水史記漢高帝元年卽位于汜水之陽張晏曰汜水在濟陰界取其汎愛弘大而潤下也有受命壇在焉○詩云出宿于濟飲餞于滸統志云卽

大滸溝一名寃水漢寃句縣以此名水經注曰濟水又東北逕寃胸縣故城南漢景帝封楚元王子執爲侯國王莽之濟平也宋改寃亭元省入州故城在西南界○郡國志云堯溝在寃城西昔帝堯所開溝也九州要記以寃卽堯葬處帝王世紀曰堯葬濟陰成陽西北四十里墨子以爲堯堂高三尺土階三等北教八狄道死葬螢山之陰山海經曰堯葬狄山之陽一名崇山二說各殊以爲成陽近是堯冢也余按小成陽在成陽西南半里許實中俗嘜以爲囚堯城士安蓋以是爲堯冢也○按

堯冢各載不同而舜耕于歷山漁于雷澤已見濟南平陽諸處今州及濮州亦俱載之志云歷山在城東六十里舜所耕處元張頴有記雷澤在城東北六十里漢揚雄兗州箴云悠悠濟河兗州之寓九河既導雷夏攸處後魏置西兗州蓋本此也○平陽亭在州東六十里左傳哀十六年衛侯飲孔悝酒于平陽者史記蘇秦說魏襄王曰大王之國東有淮潁煇棗志云煇棗故城在舊寃句縣內郡國志寃胸縣有煇棗城漢高帝十二年封革朱爲侯國索隱曰革音棘棘姓也文臺在寃句故縣西北六十五里史記列傳隱陵君施酒文臺及文臺隳卽此○園客祠在州西南五十三里故老云園客濟陰人也庭種香草有神蛾大繭之異故濟陰俗世祠桑蠶設室祀焉○甯武子墓在城東十五里又五里爲董昭墓昭定陶人魏河南尹

曹縣

在州南一百二十里

釋同州治內有漢竹邑侯相張壽碑建寧元年立又有濟陰濟陽二城濟陰卽古濟陰縣也濟陰郡及曹州治此 國初徙州盤石鎮此爲縣濟陽城在縣西南五十里釋名水北爲陽五行志漢宣帝

七年濟陽地裂五丈又昌邑王賀自定陶至濟陽
 求長鳴雞筇竹杖于此東觀漢記光武以建平元
 年生于濟陽縣光照一室是歲有嘉禾生一莖九
 穗大于凡禾因名秀卽此城也○縣有莘仲楚丘
 乘氏離狐各廢城址按郡國記云莘仲城在濟陰
 東南三十里古莘國也夏本紀鯀納有莘氏女生
 禹又伊尹耕于有莘之野湯聘以爲相卽此城矣
 今縣北十八里有莘仲集○楚丘漢已氏縣春秋
 戎伐已伯于楚丘見隱七年註疏云楚丘衛地濟
 陰城武縣西南有景山在其北昔衛文公徙楚丘
 測日景于此堂水北自城武縣界入南行五里合
 泡溝卽詩望楚與堂景山與京者也○乘氏城在
 州西北後魏乘氏縣治有乘丘春秋莊十年公敗
 宋師于乘丘是也故句陽城桂陵城葭密城俱在
 乘氏縣界句陽句瀆之丘也襄十九年執公子牙
 于句瀆之丘又隱八年宋公衛侯遇于垂注云句
 陽有垂亭矣桂陵卽史記齊威王以田忌爲將與
 魏戰于桂陵大敗魏師者竹書幽王十三年魯季
 孫會晉文公于楚丘取葭密遂城之志云在縣西
 北三十里○離狐城卽唐之南華縣也舊傳初置

縣在濮水南常爲神狐所穿遂移濮水北故曰離
狐城○水經注云濮水又東逕濟陰離狐縣王莽
之所謂狐瑞也又東入乘氏縣界東逕秦相魏冉
冢南冉秦宣太后弟代客卿壽燭爲相封于穰益
封于陶號曰穰侯富于王室范雎說秦秦王悟其
擅權免相就封出關輜車千乘卒于陶因葬焉世
謂之安平陵志云安平陵在縣西北七十里舊州
治亦謂之桂陵今設有巡簡司又十里卽古黃河
故址河水西北自衛輝界來至此分爲二派一東
南流至徐州入泗一東北流逕壽張縣之沙灣入
會通河又有黃水卽黃河之支流也水經注云河
水又東北右合黃水枝渠渠上承黃溝東北合河
而北注濟瀆卽是水矣

定陶縣

在州東南
五十里

雜說定陶卽帝堯之所都也堯先居唐後居陶故
曰陶唐氏十道志云范蠡居陶號陶朱公後乃爲
定陶縣戚姬定陶人漢高畧地至定陶獲焉後封
彭越爲梁王都此宣帝甘露二年封王子躡爲侯
國○志云范蠡湖在縣城內彭越臺在城東一里
縣南有村曰戚姬村古定陶城內有魯恭王殿基

○水經注云濟水又東北逕定陶恭王陵南漢哀
帝父也帝卽位母丁太后建平二年崩詔曰宜起
陵于恭王之園送塋定陶貴振山東王莽秉政貶
號丁姬開其槨尸火出炎三四丈吏卒以水沃滅
乃得入燒燔槨中器物公卿遣子弟及諸生四夷
十餘萬人操持作具助將作掘平恭王母傳太后
墳及丁姬冢二旬皆平莽又周棘其處以爲世戒
云時有群鷺數千銜土投于丁姬窆中今其墳冢
巍然尚秀隅阿相承列郭數周面開重門南門內
夾道有崩碑二所世尚謂之丁昭儀墓又謂之長

隧陵蓋所毀者傳太后陵耳丁姬墳墓未必一如
史說瀆南魏郡治也世謂之左城亦名之曰塋城
蓋恭王之陵寢也濟水又東北逕定陶縣故城南
又屈從縣東北流南濟也又東北右合河水水瀆
上承濟水于濟陽縣東世謂之五丈溝又東逕陶
丘北地理志曰禹貢定陶西南有陶丘陶丘亭在
南墨子以爲釜丘竹書魏襄王十九年薛侯來會
王于釜丘是也按寰宇記以陶丘卽左城已見州
下據本志則云陶丘亭在縣西南七里然寰宇所
稱故州城治定陶者縣之西南州之東北當卽其

地○城塚記云髣山廟在縣西北五里層阜之上古曹國墓地連亘十五里積壤如山自曹叔振鐸至伯陽二十五代並祠焉有宋王禹偁撰碑○剛城在縣東北卽魯之剛邑也漢縣晉改剛平後魏省有闡亭在剛縣北又縣西南十里有三鬲亭尚書湯伐桀夏師收績遂伐三鬲俘厥寶玉注云三鬲古國名桀走保之今定陶是也○荆城在縣東北二十里皇覽云是戰國魏將龐涓與孫臏相持處又十里爲海城隋賊帥孟海公陷曹州所築

東平州

在府西北一百五十五里

領縣五

漢東平國取尚書東原底平之義郡國志云州治有景子殿東平憲王蒼所起踰四丈餘有二殿東西相向後漢書明帝幸東平感念蒼謂其子曰思其人至其鄉其處存其人亡矣城塚記云東平憲王墓在州北五里峴山上有王陵臺又十五里爲東平思王墓在瓠山上思王卽宣帝之子因思還京師其塚松柏皆西靡者也○沿革表云東平國甘露二年改漢初之濟東國及大河郡也隋大業間立東平郡唐貞觀年移鄆州于此天寶後爲平盧節度使元和後賜號天平軍宋宣和始復東平

之名○志云溪堂在州城內唐鄆曹濮觀察使馬
總建以爲饗士大夫之所韓愈系之以詩有碑牛
僧孺立又有稽古堂元行軍萬戶嚴忠濟建○歲
寒亭在州城內宋待制李誠之建與蘇軾會飲于
此軾詩去歲游新堂春風雪銷後池中半篙水池
上千尺柳又明月入華池反照池上堂堂上隱几
人心與水月涼○樂郊池館在州南二十里宋郡
守劉敞建有十景總而名之曰樂郊仍自爲記○
河紀云春秋湏句郈宿鄆附庸之國也按湏句風
姓爲魯私屬秦漢之湏城縣矣唐初置鄆州于此

後唐避諱復改湏城治州西十五里宋咸平間河
圯遷來 國初省入州○京相璠曰湏胸一國二
城兩名蓋遷都須昌句是其本漢高帝封趙衍爲
侯國濟水于縣南有趙溝水注之○郈國城在州
屬汶上縣北三十里春秋郈子國也見莊八年○
唐地理志鄆州內有宿城縣宿國也古宿國城在
州東二十里莊十年宋人遷宿卽此有無鹽城在
其內烈女傳云無鹽醜女名宿瘤齊宣王善之立
爲夫人卽此城矣漢書哀帝時無鹽危山土自起
覆草如馳道狀一名金螺山宋淳化間有僧剝佛

崖上石壁純白因呼白佛山在州東三十里又三十里為鄆城水經謂之平章任姓莊三十年齊降鄆卽此今有鄆城集○寰宇記云州界內有柳舒故城哀二十七年晉伐鄭齊陳成子救之及留舒去穀七里穀人不知者也有漢穀城長張遷壽頌碑移置州學內遷陳留已吾人○洽鄉地里志云無鹽有洽鄉漢武帝封城陽恭王子慶為東平侯于此王莽之有鹽也邠鄉亭在州東五十里魯季文子鬪雞之所杜註邠魯地東平無鹽縣東有邠鄉亭○圖經云東山在州治東一里許晉阮籍東

平賦云顧東山之葱蒨卽此山也李白送梁四歸東平詩莫學東山卧卧參差老謝安○瓠山以形似瓠山圓而長也漢書瓠山山脇石一丈轉側起正高九尺六寸旁行一丈高四尺東平王雲及后謁居東蓓草祠石為息夫躬所告處矣又十里為蠶尾山聯絡望山卧牛諸峯其下有小洞庭湖唐蘇源明宴小洞庭詩序所謂左拂蠶尾者也鳳山黃華俱在左右源明天寶中太守燕其僚五太守于洄源亭歌曰小洞庭兮牢方舟風嫋嫋兮離平流牢方舟兮小洞庭雲微微兮連絕崕仍瀾壯兮緬

以沒重巖轉兮超以忽馮夷婁兮護輕橈蛟龍行
兮落層湖泊中湖兮澹而閒並曲淑兮悵而還適
予手兮非予期將解袂兮叢予思尚君子兮壽厥
身承明主兮憂斯人又歌浮漲湖兮莽條遙川后
禮兮扈予橈橫增沃兮蓬仙延川后福兮易予絃
月澄凝兮明空波星磊落兮耿秋河夜旣良兮酒
且多樂方作兮柰別何後令狐楚刻石于山頂自
爲序○積水湖在城西十八里四面縈迴百里漾
入小洞庭湖州北三十餘里有九女泉出蠶尾山
後州東五十里有坎河泉俱西南流合二湖水入
汶河○鳳山在蠶尾之右群峯環抱寺介其中石
泉清澈四面流注騷人墨士多所題詠金翰林學
士王庭筠卜居此山自號黃華遂著其勝○金山
在州西北四十里其色紫赤如金石亦堅緻河上
諸邑資以采用其南爲坤山有月巖寺馬跑泉水
出焉又南有土山距州三十里一大阜也日中無
影亦謂之無影山○棘梁山在州西四十里山頂
有石崖東西判爲二其上駕石爲橋可通往來名
曰天橋唐高適東平縣前送李少府案詩雲開汶
水孤帆遠路遶梁山匹馬遲○水經注云梁山西

南有呂仲悌墓河東崖有石橋橋本當河河移故側岸也郡國志云大清河又北至棘城西是矣寰宇記云清水石橋隋仁壽元年造工作華巧與趙州石橋相埒長四百五十尺又有劉公橋在州東二十七里宋武帝北伐至此造其地有烽倉故城相傳武帝立烽戍于此今小城存○桓公溝晉末和中將軍毛穆之所鑿義熙十年王師濟河朱超石重開注水經云桓玄率衆北入掘通濟渠今謂之桓公溝按志在州西南與南旺鉅野相接○河紀云安山在州西南二十五里山西有冀州刺史

王純碑漢延熹四年立有湖水繞安民山下曰安山湖縈迴百里四向有隄建閣其上山半有寺上有其羅墓山下有安民亭注水經云汶水又西南至安民亭入于濟汶水自桃鄉四分當其派別之處謂之四汶口○坎河在州東五十里汶水之下流也州城池有沙河大隄環之方三十里其源爲南沙河卽汶水故道○碑目云呂母宅在州西南相傳呂母起兵處宅東三里卽濟水水側有碑東觀漢記海曲呂母之子爲縣令所殺母破家結諸少年得數百人入海自稱將軍遂破海曲執縣宰

斬之以其首祭子冢卽此○塚記云劉府君墓在城東北堯陵前漢光祿勳曜也有古碑殘折○宋孫明復墓在州東北三十里蘆泉鄉歐陽脩銘○梁狀元墓在州北二十五里望山前子固塋于墓東北適塋于墓西北相去各數十步○元霍希賢墓在州東二十里希賢亦中狀元

汶上縣

在州東南六十里

古厥國邑界有厥亭存漢平陸縣史記魯敗齊師于平陸者也唐宋皆爲中都魯夫子所宰邑矣有準字池在縣堂內以石爲之外方內圓刻鯉魚四

環注以水漢唐物也○唐李白贈別其兄中都令詩吾兄詩酒繼陶君試宰中都天下聞東樓喜奉連枝會南陌愁爲落葉分城隅綠水明秋日海上青山隔暮雲取醉不辭今夜月鴈行中斷惜離群又酬中都小吏攜斗酒雙魚于逆旅見贈詩魯酒琥珀色汶魚紫錦鱗山東豪吏有俊氣手携此物贈遠人意氣相傾兩相顧斗酒雙魚表情素雙鯉呀呷鬢鬣張撥刺銀盤欲飛去呼兒拂机霜亦揮紅胞花落白雪飛爲君下筯一餐飽醉着金鞭上馬歸○水經注云汶水又西南逕東平陸縣故城

北應劭曰古厥也汶水又西南逕致密城南郡國志云須昌縣有致密城古中都城夫子為宰嘗制養生送死之節長幼男女之禮路不拾遺器不彫偽邑稱大治耆老相傳魯定公時召孔子為司空以冉伯牛攝宰一如夫子之政卒因塋焉有墓在縣西門外感化橋側○志云汶水自平陰縣界西南入縣北金改汶上之名所由取也濟河在縣北一名大清河東北合汶水以入于海縣西南二十五里有新開河東北五十里有龍鬪河又五里有灤當山泉俱東南流入魯溝河以達于汶又蒲灣

灤在縣北三里舊名仲勾陂周圍十餘里魚營泊在縣西北十五里周迴四十里石樓泊在縣西南二十里周迴三十里每秋水汎漲一望無際遙視邨落在煙波杳靄中又常有城樓人馬之狀出于水上謂之水市洵奇境也其水皆入于汶水經注云汶水又南逕漢衛尉衡方墓墓前有古碑建寧年立浚儀令衡立柎亦有一碑按在縣西南十三里○志云壇山在縣東北三十里山形平坦如壇故名又五里為采山青山舊傳山上花木如采其色長青也太白山在縣東五十里以太白常游者

涿州志唐盧照隣調新都尉以病免官隱太白山
卽此其傍又有雲尾山太白出雲則雲尾之雨隨
下其水流入南旺湖○河紀云南旺湖在縣西南
三十里濟寧接界其地特高汶水西南流至此而
分上有禹廟及分水神祠湖在漕河西岸縈迴百
里卽鉅野大澤東畔也宋時與梁山灤水匯而爲
一圍三百餘里卽南渡時宋江軍所據梁山泊也
及會通河開始畫而爲二漕渠貫之有蜀山湖在
東涯卽南旺東湖也周迴六十五里有山一區在
水中央望之若螺髻焉曰蜀山蜀者獨也上有聖
母祠古碑記云山形水勢有類西蜀矣○闕亭在
南旺湖中高阜六七春秋桓十一年會于闕是也
杜預曰涇昌縣東南有闕亭魯自隱桓以下皆葬
于此至今水際時見烟雲樓臺之狀河使者謝肇
淞南旺挑河行堤遙遙河瀰瀰分水祠前卒如蟻
鷄衣短髮行且僵盡是六郡良家子淺水没足泥
没骨五更疾作至夜半夜半西風天雨霜十人八
九趾欲斷黃綬長官虬赤鬚北人騎馬南有輿伍
伯先後恣訶撻日昃喘汗歸遽蔭伍伯訶猶可里
胥怒殺我無錢水中居有錢立道左天寒日短動

欲夕傾筐百反不盈尺草傍濕草炊無烟水面浮
米割人膝都水使者日行隄新土堆與舊岸齊可
憐今日岸上土雨來仍作河中泥君不見會通河
畔千株柳年年折盡官夫手金錢散罷夫未歸催
築南河黑風口

東阿縣

在州西北
七十里

齊柯邑春秋莊十三年盟于柯卽此漢置東阿縣
故城在西南二十里卽阿大夫所治邑○阿井在
城內水經注曰阿城北門西側阜上有井其巨若
輪深六丈歲嘗煮膠以貢天府郡國志云其地出

繒繅故秦王服阿繒之衣謂此矣○志云少岱山
在城東一里橫亘郭門其上有臺一成以在岱宗
之西故名稍南一里爲寺山又南四里爲鐔山形
方而墮有泉洞之屬○穀城山在縣東北五里一
名黃山山巔有石巋然數丈其色正黃故曰黃石
史記黃石公出一編書授張良曰讀是則爲王者
師後十三年見我濟北穀城山下黃石卽我也他
日良于山下果得黃石祀之後人立祠歲以三月
十八日致祭有唐李卓黃石公碑在祠內西征記
云穀城管仲私邑南山有管仲井河紀云卽今治

也統志云穀城在縣南十二里碯礮山之下劉宋檀道濟與後魏交兵于此置有關城城南三土堆卽道濟唱籌量沙之所宋元嘉二十七年寧朔將軍王玄謨平碯礮立戍守之後魏畧得其地因立濟州于此○酉陽雜俎載濟南太守胡諮得白虎于洞中燕建平中事志云城西三里虎窟山是虎窟之南卽碯礮也○魚山在縣西八里一名吾山漢武帝瓠子歌云吾山平兮巨野溢魚佛鬱兮迫冬日卽此山也今其跡已湮曩馬頰河經山前西達張秋謂之鹽河魏曹植改封東阿王嘗登此山有終焉之志遂塋其西搜神記以魚山卽思王闢梵處矣五代史載梁祖朱溫與鄆兗兵大戰于兗今壁壘存口述征記云濟北郡史弦超魏嘉平中有神女成公智瓊降之超同室疑其有姦以告監國詰問超具言之智瓊乃絕後五年超使將至洛西到濟北魚山下所上遙望曲道頭有車馬侶智瓊前到果是同乘至洛克復舊好太康中尚存唐王維有魚山神女歌蓋詠此事○志云香山在城北十五里大清河西岸與縣城相直香山之北有艾山兩山相對河出其中又其北有凌山去城三

十里香山之西有曲山山甚狹小疑卽渠丘山也
○浮山在縣東南三十三里故老相傳堯時大水
此山浮于水上有人纜船于巖石間水經注謂之
大檻山其山高大有爲群峯之冠傍有狼山一名黃
崖山狼溪水出焉西北流經縣北入汝○河紀云
安平鎮在東阿之南枕陽穀壽張二縣境舊名張
秋五代柴世宗遣宰相李穀治隄自陽穀抵張秋
其名始見于此今以北河郎中治張秋城南隅
掛劒臺河東岸有徐君墓相傳吳季札聘齊過徐
君返而掛劒處也墓前有祠並祀二賢有司春秋
致祭臺左右生草其形一正一斜若負劒然能療
人心疾元都水監丞滿慈記云古碑刻有季札掛
劒徐君墓樹八字然南直隸徐泗二州俱載有徐
君墓未詳孰是○戊巳山在鎮城北顯惠廟後我
弘治間通政使韓鼎築下臨龍潭取土制水之義
黑龍潭在城北半里許一名平河泉故黃河決口
也東流旣塞泉涌地中滙而爲潭深不可測相傳
有龍蟄焉嘉靖初郎中楊旦飲其地欲涸而觀之
水決未半風雷大作乃止○荆門驛在鎮城北隅
上下二閘設于鎮北十餘里有荆門寺北去十五

里○金堤在鎮城南堤墳隆起延亘鄆濮俗稱始
皇堤漢文帝時河決酸棗東潰金堤卽此或云卽
漢王景所脩汴渠堤也明太史殷雲霄大堤詩二
首北隄楊柳綠絲烟更有桃花紅可憐携樽邀我
南隣去美酒憐渠不索錢又南隄北隄布穀飛隄
邊禾黍青離離隄上野花開復落隄下行人行不
稀○桃丘在鎮城東十八里春秋桓十年會衛侯
于桃丘杜預曰東阿縣東南有桃城按今爲桃城
舖舖旁一丘高可數仞每陰雨後烟霧中隱隱有
市井車馬之形土人以爲蜃市云謝肇淛詩桃丘

一坏土高與培塿齊古道無人烟芳草何淒淒會
盟有遺壘介駟猶疑嘶○釣臺山在鎮城東南二
十五里山多碎石若魚蟹狀其麓有釣磯相傳嚴
子陵釣魚處石上有雙趺痕離此不遠有子陵臺
考之漢書但言子陵釣大澤中而不言所在未知
是否謝肇淛詩驅車東南巔苔阜俯清泚危石蘆
花中隱隱趺雙履云是嚴子陵披裘釣于此清風
眇莫攀丘壑徒爲爾擾擾風塵間客星竟誰是○
龐洵井在鎮城東數里方圓七十二眼俱以琉璃
甃之名曰琉璃井相傳龐洵所鑿又東三里許有

孫臏營史傳臏出阿甄之間疑卽其地也○統志云白鴈泉在縣東南三十里相傳漢王伐楚經此士卒道渴俄見白鴈驚起因而得泉故名○項羽冢在舊城東南十二里漢高帝既滅楚魯猶爲羽守乃持羽首示魯魯乃降遂以魯公禮葬羽水經注云穀城西北三里有項王羽之冢半許毀壞石碣尚存○按水經注及寰宇記與統志府志北河紀所載山川里數往往不同而東阿爲甚大抵穀城爲縣治所枕而穀城則在碣礮山之下今縣與齊東柯相去既二十餘里而東柯復遷徙者屢如縣南十二里之南谷鎮縣北十里之新橋鎮皆有東阿故城一爲宋開寶年徙一爲紹興年徙固自不同矣今治乃洪武八年徙○新橋鎮有鐵塔寺浮屠十有三級高十二丈宋熙寧間鄆州僧應言所建趙槩爲請額曰薦誠蘇文忠集有五百羅漢院記卽此

平陰縣 在州北一百二十里

水經云濟水又北逕平陰城西註曰春秋襄十八年晉侯沈玉濟河會于魯濟尋溴梁之盟同伐齊齊侯禦諸平陰者也京相璠曰平陰齊地在濟北

盧縣故城西南十里有防門去平陰三里左氏傳
齊侯塹防門而守之卽此地其水引濟故瀆尚存
今防門北有光里齊人言廣音與光同卽本傳所
謂守之廣里者也巫山在平陰東北昔齊侯登望
晉軍畏衆而歸師曠邢伯聞烏烏之聲知齊師潛
遁人物咸淪地理昭著矣今巫山之上石室者
老言孝子郭巨塋母處世謂之孝子堂濟水右迤
過爲潛湖方四十餘里以達于汶汶水又西南有
沁水注之水出肥縣東北自源西南流逕肥城縣
故城南樂正子春謂其弟子曰子適齊過肥肥有
君子焉左逕句窳亭北漢章帝元和二年鳳凰集
肥城句窳亭復其租而巡太山卽是亭也○寰宇
記云肥城在縣東南古肥子國漢縣後漢時省故
城尚存○榆城在縣西北二十里榆山下隋開皇
間置榆山縣于此大業二年改爲平陰又有鞏城
在縣東成二年齊侯戰于鞏者也京茲故城在縣
南古齊邑鑄鄉周武王封堯後于此○河紀云黃
河去縣十里竹書梁惠王二十年齊築防以爲長
城城緣河經太山千餘里至瑯琊臺入海徃徃有
壁門邸閣蘇代說燕王曰齊有長城鉅防足以爲

固蓋首諸平陰矣縣有新開河在城西十里即濟河之下流也南岸有山曰蹲龍下有盤石跨河舟行者患焉宋張方平乃鑿新河引水北行以避之民甚稱便○新柳溝在縣東南五十里出高坡沙上中又南流三十里入衡魚河故肥城縣泉來注之俱南流百四十里入汶河○志云會仙山在縣城東古傳仙人聚會之地山有石跡謂之仙人履迹縣南二里有文山狀如玉几故名又十里為秀屏山○龜山在縣西十八里即龍橋山也其上有壽峯寺唐時所勦又七里為石門山東西相向少通人跡○孔子山在縣西南三十里本名紫蓋山上有一夫子教書堂遺址○陶山在縣東三十五里范蠡浮海出齊自號鴟夷子皮間行止于陶因號陶朱公

陽穀縣 在州西北百四十里

春秋僖三年齊侯宋公會于陽穀杜預注云齊有陽穀亭秦漢須昌縣地也隋析置今縣因古陽穀城為名按孔穎達疏陽穀在東平須昌縣北即此謂矣○志云穀山在縣治東北正街中春秋謂之小穀齊桓公以魯莊二十三年城之有武陽水在

東故曰陽穀水經云濟水又東逕武陽縣又北過穀城縣西是也濟水側岸有尹卯壘南去漁山四十餘里人穀城界○濟水又北逕周首亭西春秋文十一年齊大夫王子成父獲長狄僑如弟榮如埋其首于周首之北門卽是邑矣世謂之盧子城濟北郡治京相璠曰今濟北所治盧子城故齊周首邑也按志在東阿縣東北直當縣之南○縣南有會盟臺春秋僖二年齊桓公會江黃所築亦卽魯將曹沫挾匕首劫齊桓返而邑于此矣里人柴世需題會盟臺絕句城南古盟臺空寂今如此和

風動平疇落日照秋水○南土山在縣北二十里北土山在東北十五里皆昔時戰壘舊基又十五里爲古城不知所本或謂卽穀之舊城也又二十里爲阿城相傳齊柯大夫所治杜預曰城西南有大澤名柯澤春秋襄十四年衛孫文子敗公徒于柯澤卽此處矣水經云河水又歷柯澤有七級渡志云黃河去縣城北十里沙河在縣東二十五里清水河在縣南五十里俱從壽張入境馬頰之故渠也西湖陂在縣西十五里一名黑龍潭長三十餘里又縣北二十五里有鷺鴨陂周廻二十餘里

其西北卽沙鎮○唐元和開淄青節度使李師道治鄆州使知兵馬使劉悟屯陽穀以拒官軍悟勒兵潛入鄆城斬師道首遣使送田弘正營露布以聞于是淄青等十二州皆平

壽張縣

在州西一百二十里

春秋良邑戰國之剛壽也漢壽良縣應劭曰光武叔父諱良因改爲壽張壽州故城在縣東南十五里隋末百姓築堡唐武德年于此置壽州旋廢○隋唐已後有壽張城二一在縣西二十里之竹口鎮一在縣界內梁山之東○寰宇記云梁山在縣

南三十五里郡志在縣南七十里本名良山梁孝王嘗獵于此改爲梁山周迴二十餘里上有虎頭崖及古石龕跡又有石臺鑿石爲蓮花周圍二丈相傳有神僧說法于上其下有洞俗名黑風洞山南爲古大野澤禹貢所謂大野旣潞也宋謂之梁山灤矣有土山在梁山西南十七里又南爲戲狗山亦梁孝王所獵也相傳孝王獵時有人獻一牛角在背上孝王心惡之因卒此處○縣界有范城左傳范宣子對魯大夫穆叔曰昔勾之祖在周爲唐杜氏晉主夏盟爲范氏今城卽勾食邑漢爲縣

水經云河水于范縣東北流爲倉亭津述征記曰
倉亭津在范縣界津河濟名也濟水故瀆又東北
過壽張縣西界安民亭南汶水從東北來注之戴
延之所謂清口矣郭緣生曰清河首受洪水北流
濟或謂清則濟也濟水又北逕梁山東袁宏北征
賦曰背梁山截汶波卽此處矣濟水又逕微鄉東
春秋莊二十八年經書冬築郟京相璠曰公羊傳
謂之微在東平壽張縣西北三十里有故微鄉魯
邑也杜預曰有微子冢濟水又北分爲二水其枝
津西北出焉謂之馬頰水○注水經云汶水西南

流逕壽張縣故城北縣有壽冢漢世祖十二年封
樊宏爲侯國又西至壽張故城東逕爲澤渚初平
三年曹公擊黃巾于壽張東鮑信戰死于此志云
安民亭在縣東南故范城在縣東二十里○塚記
云漢張子房墓在縣南五十里敬聖寺北三塚鼎
足相峙世傳子房托從赤松子遊卒塋于此其二
塚蓋衣冠也滕縣微山社亦有子房墓未詳孰是
○宋張公藝墓在縣南十里卽九世同居者○明
殷給事雲霄墓在城北半里雲霄字近甫正德間
以詩名與李獻吉有倡和見集中

沂州 在府城東三百六十里 領縣三

周禮青州鎮曰沂山又云其浸沂沐故州以此名

矣沂州後周宣政年置實秦漢以來之瑯琊郡齊

景公所謂遵海而南放于瑯琊者也漢紀高后七

年封營陵侯劉澤為瑯琊王于此後漢瑯琊王京

乃徙郡北之十五里開陽城晉武帝改封東莞王

伸為瑯琊王永嘉之亂嗣王睿東渡是為晉元帝

昔元帝于郡城東北隅置發干戍以南軍鎮之有

永嘉臺在郡西南二里故老言瑯琊王睿所築○

晉書王祥王導義之俱瑯琊人祥字休徵仕至太

保墓在城東北十五里今城北二十五里有王祥

河源出王祥廟後即其卧水躍鯉處亦名孝河口

王導故居在城東北三十八里臨沂故城南三里

導字茂弘為元帝宰相卒于江東此蓋其本宅也

○澤筆池在州城內王羲之曝書堂前舊傳其浣

筆處今為普照寺○開陽城春秋邾國祝融之後

邾姓也昭十八年邾人入邾註曰今瑯琊開陽縣

又哀三年季孫斯叔孫州仇城啟陽註曰即開陽

也漢避景帝諱改後漢瑯琊王京徙都于此漢官

儀曰洛陽城南面東第一門門始成夜有一柱來

止樓上開陽縣上言南門一柱飛去卽此城門柱也○臨沂城故郈城也在州東三十六里左傳定十年叔孫州仇帥師圍郈注云郈叔孫氏邑隋開皇年于此置臨沂縣大業移之州理此城遂廢○志云艾山在城西二十五里魯隱六年公會齊侯于艾卽此地也沂水出焉又州西四十里有五坪山五峯相連其上平坦故名又西南十里有冊山其巔有井將雨則雲出○羽出在州東南一百里尚書殛鯀于羽山註云東裔也禹貢羽畎夏翟魯氏注云雉具五色出羽山唐崔國輔詩羽山一點

青海崖雜花碎其下爲羽淵鄭子產曰鯀死其神化爲黃能入于羽淵□地里志云羽山在東海祝其縣南山高四里周迴八里春秋之祝丘也桓五年城祝丘漢爲卽丘縣祝與卽齊魯之音其實一也故城在東南五十里○按志沂河在城東二里東北自沂水縣來至州境南經下邳注淮泗入于海禹貢淮沂其乂是也然水經註云沂水出尼山西北經魯雩門卽所謂風雩而浴乎沂者又泰山新泰縣下有沂州城以爲沂水所出而名又武陽之冠石山有水出焉亦謂之沂水如此則沂水之

源固自不同然其下流入淮泗則一也○志云州東五十里有沂山以沂水所經也沐水出焉西北流入州境會諸澗水南經馬陵山入于淮泗又東北十餘里有湯河源出溫泉山東南流入于沐昔管仲家于此今有相公莊及管林○東沭河在州西南一百里源出費縣南山谷間東流入芙蓉湖下諸湖潭西沭河在州西北百二十里源出抱犢峒山之瀑布泉又枋河在州北二里會柳毅蒼山諸泉涑河在州西二十五里會天井汪諸泉此皆注沂沐之水以入于淮泗者○州南七里有白馬

泉又二里有馬跑泉州北五十里有桃花阜泉又二十里有長亭池又有常汪池柳行池及漏陂諸水俱入沂河○水經注曰沂水南逕中丘城西春秋隱七年夏城中丘書不時也志云在州北三十里後名諸葛城以瑯琊諸葛亮來居此名○沂水又東過襄賁縣東屈從縣西南流魯連子稱陸子謂齊潛王曰魯費之衆臣甲舍于襄賁王莽更名章信者也志云襄賁城與鍾離城相對鍾離在州西南百二十里春秋成五年會吳于鍾離卽此其地又有鄆子城春秋鄆國遺址尚存又有二疏城

漢疏廣疏受歸老于此東漢童恢爲令更名不其城○志云康王城在州東五十里前有沙阜墩謂之康王射箭臺俗名故縣城疑卽臨沂縣所遷者又三十里爲新城春秋伐鄭圍新城卽此其地又有東陽城左傳哀八年克東陽呂氏春秋夏孔甲游田于東城卽此今入費縣界○許田城在州西北四十五里春秋隱八年鄭伯使宛來歸枋易許是也後人以田字與山字相似因訛爲許由城又五十五里有穆公城相傳魯繆公所築城東有九女墩南有青駝鎮西有石門盆泉○碑目云漢南

武陽功曹墓闕銘在州治內章帝章和三年立又一銘元和中立○宋人刻漏碑元祐六年立在公署內又有香林館平野亭在城東樓上雨聲軒在東湖岸俱金元時建○季文子墓在州西南百二十里神峯山碑書魯季文子之墓○荀卿墓在舊蘭陵城入州西界 國朝郡人給事李華歌古塚瀟瀟鞠狐兔路人指點荀卿墓當時文彩凌星虹此日荒涼卧烟露烟露繁今愁黃昏蒼蒼荆棘如雲屯野花發盡無人到惟有蛾絲罩墓門○高士傳載安期生者瑯琊人也老而不仕賣藥海邊秦

始皇東游請與語三日夜賜金璧直數千萬俱不受置于阜鄉亭而留赤玉舄爲報留書謂始皇曰後數十年求我于蓬萊山下

郟城縣

在州東南二十里

水經注云郟故國也少昊之後春秋昭十七年郟子朝魯公與之宴昭子叔孫婁問曰少昊鳥名官何也郟子曰吾祖也我知之黃帝炎帝太皞以雲火龍紀故爲雲火龍師而雲火龍名我高祖少皞之立也鳳鳥適至故爲鳥師而鳥名孔子從而學焉旣而告諸人曰天子失官學在四夷者矣竹書

齊烈公四年越子朱句滅郟以郟子鳩歸縣故魯也東海郡治秦始皇以爲郟郡漢高二年更從今名卽王莽之沂平也○郟子宅在故郟城內郟子墓及祠俱在縣南十五里有傾蓋亭在縣北十里舊傳孔子遇程子傾蓋而語處又孔子嘗登山登滄海有望海樓在孔望山上明劉翔詩傍海結高樓乃記聖遊跡扶桑曉日紅瑯琊曉峯碧洪濤吼晴雷孤鴻渺秋色觀此難爲言臨風重嘆息○志云孝婦墓在縣東十里婦東海人漢宣帝時誤殺之致旱三歲敕祭其墓乃雨○于公宅在縣西十

里于公治獄有陰德嘗語家人當高大吾門子孫
必有興者今其社尚名高大社○馬陵山在縣東
十五里北亘沂州南抵宿遷其山高阜狀若馬相
傳卽古瑯琊山也齊孫臏勝龐涓于此上有由吾
洞○石梁山在縣西北六十里有巨石如梁各天
生橋又縣東北九十里有蒼山滄海在目汪洋無
際中有牛口峪○大方湖在縣西南十五里方廣
百畝夏月蓮花盛開香聞數里○後漢書郟有夏
士亭古通士萬丘欣也今在境內

費縣

在州西南
九十里

古費國也春秋隱元年費伯帥師城郎後爲魯季
氏之邑僖元年公賜季友汶陽之田及費論語季
氏使閔子騫爲費宰皆是矣故費城在縣西北二
十里漢縣治祊城左傳鄭伯請以泰山之祊易許
田註曰祊鄭邑在瑯琊費縣東南東漢移理薛固
後周移陽口山南隋復祊城以祊水所經而名○
祊水源出縣西南百里之大崖阜東南流經沂州
郟城入下邳界有浚河發源聰山東流合于祊水
山在縣西北一百三十里○寰宇記云顓臾城在
縣西北八十里顓臾風姓伏羲之後魯附庸國東

蒙山在縣北七十五里以在蒙山之東而名論語季氏將伐顓臾子曰昔者先王以為東蒙主冉有曰固而近于費此之謂矣○蒙山在縣西北八十里即禹貢所謂蒙羽其藝也山頂有白雲巖產雲茶其下有蒙城高士傳萊子隱居蒙山之陽以莞蔑為垣蓬蒿為室岐木為牀著艾為席衣緼飲水墾山播殖著書十五篇又劉芳徐州記後漢承宮射稼于蒙山之下其山高四十里長六十九里北與新泰縣為界宋時瑯琊人賀元脩真于此○寰宇記云南城在縣南九十里史記齊威王使檀子

守南城楚人不敢為寇舊志謂之南成城即曾子塋父處王符所謂南城之冢也後漢書鄭玄漢末遭黃巾之難客于徐州孝經序云僕避難于南城山棲遲巖石之下念昔先人餘暇述夫子之志而注孝經蓋康成孫徹所作也今西上可二里許有石室焉周迴五丈俗云鄭康成註孝經于此今有城曰鄭城在西南七十里○故東陽城在縣界春秋襄八年吳師克東陽今之關陽鎮是也又有故城在縣東五十里中有隱真觀相傳顏真卿尸解後所居處又乾元中詔諸路各置放生池縣有一

馬顏魯公爲之銘○石門城在縣西南九十里子
路宿于石門當在此魯曲阜南門者非是路史謂
之南武城子游絃歌之舊邑也又原憲城在縣西
北百一十里有原憲墓俗呼爲原憲堆○唐校書
郎李潛漏澤賦碑在縣解內宋至和間出于泥中
今斷裂爲二○宋蘇唐卿醉翁亭石碑在縣廳左
唐卿與歐陽脩同時爲費宰爲刻其文併歐陽公
徃復手帖

東昌府

隸山東
布政司

領州三縣十五

春秋齊西鄙也秦置東郡漢以後爲魏郡爲濟陰
爲清河唐爲博州博平郡元改爲東昌路 國初
設府漢王子侯表宣帝封清河剛王子成爲東昌
侯東昌之名本此後漢書肅宗元和二年東巡幸
東郡引見太守張酺及門生郡縣掾史並會庭中
令講尚書一篇今有講堂遺址在治內○志云公
惠堂宋熙寧間建卽府正堂也城中有望嶽樓以
可眺望秦嶽而名臺基高廣數丈樓作四層矗立
雲表雄勝甲于齊魯今名光嶽樓又有綠雲樓在

東昌府志 卷之五
城西北隅卽宋綠雲亭故址○玉版臺在城東北
相傳晉人掘得玉版于此因建臺以貯之○玉環
井在治西南一名玉井相傳井中有石如玉鑿之
渾然如井甃故名○麒麟碣在府學內勒淳于髡
等三十人贊于上志謂不曉其義仝攷漢書安帝
延光二年東郡奏黃龍二麒麟一見于濮陽或者
當時立碣本此俗傳以取麒麟閣者譌也又有三
絕碑金大定年重脩學王去非撰文党懷英篆王
廷筠書時稱三絕云

皇明實錄建文元年十二月

成祖靖難師至東昌平燕將軍盛庸麾兵圍之數
重幾不免乃易服躍馬潰圍出退駐館陶初起兵
時軍師姚廣孝曰師行必克但費兩日耳及敗始
驗前言兩日者昌字也

聊城縣

附郭

齊西界聊攝地齊謳行云東被姑尤側南界聊攝
城齊晏子曰聊攝以東其爲人也多矣古聊城在
縣西北十五里有魯連臺高七十尺卽射書燕將
之所陳徐伯陽詠魯仲連詩魯連有高趣意氣本
相求笑罷秦軍却書成燕將愁聊棄南金賞方從

滄海遊寄言人世客非君能見留唐李白前題齊
有侗儻士魯連特高妙明月出海底一朝開光耀
却秦振英聲後世仰末照意輕千金贈顧向平原
笑吾亦澹蕩人拂衣可同調明謝肇淛懷古西郊
一坏土傳是魯連臺遺鏃莓苔冷孤城烟霧開冥
鴻高士意躍馬霸圖灰蘋藻年年薦松風夜鶴哀
肇淛字在杭萬曆間左遷郡司理有居東集○寰
宇記云博固城枕聊河之曲俗訛爲布鼓城相傳
石勒時築在縣東北二十五里唐博州治也五代
晉開運間河溢郡守羊使君史失其名視城欲沒

投水而死至今有羊使君廟因移郡于西南十五
里之堦陵又圯于水遂移之季武陵乃今治也治
內有漢東郡太守王尊祠唐李德裕詩河水昔將
決衝波溢川濤崢嶸金堤下噴薄風雷音投馬災
未弭爲魚歎方深惟公執圭璧誓與身俱沉誠信
不虛發神明豈爾臨湍流自此迴咫尺焉能侵逮
我守東郡淒然懷所欽雖非識君面自謂知君心
意氣首相合神期無古今登城見遺廟日夕空悲
吟○水經注云漯水又北逕聊城縣故城西城內
有金城周匝有水南門有馳道絕水南出自外泛

舟而行矣東門側有層臺秀出雲表魯仲連所謂
還高唐之兵郤聊城之衆者也○北河紀云漯河
在城東七里俗呼涓河卽黃河之支流也圖經漯
河發源頓丘出東武陽縣經博平至州境又城東
南會通河元至元間鑿以通漕運自兖州陽穀縣
界入境北流經博平清平二縣至臨清州入衛河
凡二百五十里建閘三十有一○寰宇記云郭水
出聊城東北水泛則津津注水耗則輟流南岸有郭
城圖經引春秋郭亡二字以爲亡國郭氏之墟也
見莊二十五年○武水在城西南六十里隋開皇
中置武水縣于此唐改曰崇武今崇武驛沿其名
五代周省入故城內有石柱後魏孝文帝所立爲
鄴東之表水經云武水東流從石柱北是也唐開
元間詩人孫逖武水人宋大觀年立爲鎮今設武
水巡簡司○四瀆津在縣東八十里水經云河水
又東流爲四瀆津俗名四瀆口隋于此置四口關
○志云平山在郡城闌闌間微有土阜 國初設
平山衛以此陳天秩平山衛人以明經起家淹該
經史歌賦自娛同時有田淳者亦博雅尤精于攷
核爲當縣人○荏山在縣東五十三里漢在平縣

設焉今縣東南跨在平界有重丘卽春秋襄二十五年諸侯同盟于重丘者也牡丘在縣東北七十里僖十五年楚人伐徐公會齊侯鄭伯許男曹伯盟于牡丘卽此○城塚記云微子城在縣東北十八里世傳商受時微子所封及周克商始封于宋○聶城在縣西左傳僖元年齊人宋人曹人師次于聶北是也縣西南十二里有夷儀城春秋遷邢夷儀齊取于邢而有之以爲西鄙亦見僖元年又史記世家獻公自夷儀返于衛皆此處矣東漢書聊城有夷儀聚光武時代郡范升拜議郎起爲聊

城今常保此城○高陽氏陵在縣西北二十里陵前有聖水井旱禱輒應○巢父墓在堯陵界卞莊子墓在城西二里秦聶政墓漢華歆墓晉劉寔墓吳隱之墓俱在縣東北

堂邑縣

在府城西四十里

漢陳嬰爲堂邑侯者今南直隸之六合縣是也當縣隋開皇二年置以西北古堂邑故城爲名相傳初築城時有白雀馴集因名白雀城元置白雀觀于此今爲真武廟基掘有石碣題白雀觀三字○寰宇記云本漢發于清二縣地發于故城在縣西

南五十里清縣城在縣東南三十里晉改爲樂平
後趙錄曰東海王使征東將軍苟晞擊汲桑石勒
救之爲晞所敗奔樂平是矣○水經注云河水故
瀆北逕發于縣北城西又屈逕其北王莽之所謂
戢楯也漢武帝以大將軍衛青破左賢王功封其
子登爲侯國水經又云漯水東北逕樂平縣故城
東縣故清也漢高帝八年封弩將室中同于清宣
帝封許廣少弟翁孫于樂平並爲侯國王莽之清
治矣漢章帝建始中更從今名○志云毛州故城
在縣北五十里俗呼爲堠堠塚今堠南尚有城址

拾遺錄云禹治水所穿鑿處皆青泥封記使玄龜
印其上疑卽此地也○縣西十里有化及臺相傳
宇文化及軍此俗呼爲千戶營卽舊堂邑縣址○
古戰場在縣東南三十里相傳戰國孫臏龐涓戰
處志以孫子之戰疑不在是攷唐書平原太守顏
真卿與清河李萼破安祿山將袁知泰二萬餘人
于堂邑當卽其處○金石錄云唐葛公爲堂邑令
有學碣贊在縣學○元趙孟頫有脩學碑今斷裂
不全○宋熙寧間耿幾父爲令黃魯直過堂邑寄
以詩云呼船凌大河驅馬踏平沙道傍開新邑千

東昌府志卷之五
戶有生涯蓋今治卽幾父所遷者元至大間虞集
有書堂邑張令去思碑蓋爲濟南張希孟云○塚
廟記云太公廟在縣北二十五里有古碑○宋宰
相廉公諤墓在城東北八里碑碣存元總管張繼
祖墓趙孟頫銘又天水郡趙至墓去城北五十里
○志云邑人任淳官御史嘉靖間以大禮罷歸村
居讀書工詩賦所著有麟石集

博平縣

在府城東
四十五里

齊博陵邑史記威王伐晉至博陵徐廣注曰東郡
之博平也博平漢縣東漢永平中下邳周紆爲此

縣令○寰宇記云故攝城在縣西南二十里卽春
秋聊攝並稱者也靈縣城在東北三十里漢縣唐
改爲靈泉縣旋省入河紀云靈泉在博平之莎堤
一名涵管洞巨石甃成六管三涵以泄暴水置漕
岸傍○水經注云屯氏故瀆上承大河瀆于靈縣
南地理志曰河水自靈縣北出爲鳴犢者也王莽
之播亭矣○志云駱駝山在縣西北十五里土阜
巋然形似駱駝故名又十里爲平山有洪鎮寺舊
址又五里卽博平舊城城南有宋孫奭宅奭中九
經狀元及第坊尚存○博平舊縣有晉臺棋博晉

公子重耳自翟來奔齊桓公以宗女妻之留齊五歲後歸晉國故名○治內潔軒唐縣令王牒子駿建有銘刻厭次張黻撰靈泉侯珪書○塚廟記云燕子塚在縣東南五里漢吳王濞構七國反將軍竇嬰等破之齊王不同謀而被殺既塋有燕子啣泥于冢上○魯義姑冢在縣西北十五里之鷺子歸亦土阜也義姑卽遇難棄子而存姪者今祠存○還駕店在縣北二十三里五代史後唐明宗屯兵于明靈寨卽此地也有行幄基址○城南五里有宋孫宣公墓奭後徙居須昌祖墓尚存此又城南有賈鉉墓鉉在金時官武安軍節度使亦有張子野墓歐陽修銘于野博州人張先也

在平縣

在府城東北七十里

山之平地曰在平秦縣晉末移治聊城界旋廢金時劉豫復于此置按說文在草盛貌俗作在應劭曰在在山之平地也○史稱石勒賤時賣入在平人師歡家爲奴每屯耕于野常聞鞞鐸聲懼奇而免之懼家隣于馬牧勒乃與牧帥汲桑結壯士爲群盜卽此處也唐馬周在平人今治內有馬周廟

又有墓在城東里許按在平唐武德初魯復至貞
觀再廢故周得爲縣人○一統志云夫子堂在文
廟西南舊傳夫子將適趙聞鳴犢之變歌而返魯
經此故後人爲立堂又縣東北有孟館以孟子之
齊遊梁館舍焉○在山草堂馬興祖建以聯群儒
之讀書者孝思亭張通甫建虞集記致慤亭尚書
梁宜建吳澄記已上俱元人 國朝里人班祿有
書堂在東村祿博雅工于詩律仕止少尹所著有
東村稿○志云淳于髡墓在城西二里許魯連村
在東北二十里地名玉樓店相傳仲連子所居○

張良橋在縣北十里馬庄在縣南十里卽唐中書
令周故宅也今爲馬庄舖相近有興隆岡岡下坡
陀相屬內有鐵墓不知所自或以爲金翰林學士
馬定國墓今屬興隆寺又南二十里爲晉賀藥宅
今名賀藥店○水經曰濟水又東北與中川水合
註云水東南出山在縣之分水嶺溪一源兩分泉
流半解亦謂之分流交水南出太山入汶半水出
山在縣西北流東逕太原郡郡治山在堽北劉宋
僑治也與漢賓谷水合○水經曰瓠子河又東北
過在平縣東爲鄧里渠註云自宣防已下將渠已

東昌府志卷之五
上無復有水將渠下水首受河自北爲鄧里渠河水又東北過荏平縣西河自鄧里渠東北逕昌鄉亭北逕碣礮城西述征記曰碣礮津名自黃河泛舟而渡者皆爲津也其城臨水西南崩于河宋元嘉二十七年以王玄謨爲寧朔將軍前鋒入河平碣礮守之都督劉義恭以沙城不堪守召玄謨令毀城而還魏立濟州治此河水衝其西南隅又崩于河卽故荏平縣也王莽之功崇矣經曰大河在其西鄧里渠歷其東卽斯邑也而與柳城分河河水又逕荏平城東城內有故臺世謂之時平城非也蓋荏時音相近耳○志云馬頰河在縣西北潭在縣西南大溪坡在縣西入博平界

莘縣

在府城西
南九十里

漢陽平縣縣北有古莘亭顧野王輿地志云陽平之莘有衛宣公二子廟宣公二子曰伋曰壽宣公以新臺之刺使盜待諸莘伋壽爭相爲死者也○寰宇記云周武帝置武陽郡于此郡國志武陽莘之東鄉水經注云武陽大城西門有古水井謂之水井門又天成門外有一石臺號曰武陽臺東南十里有頓城後漢臧洪爲東郡守治爲袁紹所圍

絕食不屈而死今城四周水匝隍塹圍跡尚存
水經其城南應劭曰縣在武水之陽王莽之武昌
也然則漯水亦或武水矣漯水于城東北合為一
瀆東北出郭逕陽平縣之岡城西郡國志曰陽平
縣有岡城亭漢昭帝元平元年封丞相蔡義為侯
國漯水又北絕莘道之西北有莘墟春秋僖二十
八年晉文公城濮之役觀師于此也○圖經云斗
城在縣西南七里其形如斗故名又縣北四十里
有冢中聚襄二十五年閭丘嬰出奔冢中即此今
為馬橋鎮志云冢山在縣北十五里後魏武昌二

泉湧碎石中曰冢山泉宋縣令趙嶮建亭其上

○縣東北有古塔高十三層縣東有古堤逶迤至

西以障馬頰河黑龍潭水之衝也○塚記云唐贈

左散騎常侍汝南韓國昌墓子魏博節度使韓君

雄祔在縣西南二十五里吳珪撰碑○宋魏國文

正公王旦墓在縣東北二里志按歐陽脩碑天禧

元年九月旦薨詔以其年十一月塋于開封縣新

里鄉則墓不應在此疑為公父祐當時所築也祐

有手植三槐堂在縣內蘇軾記○姑蘇志云宋季

龔濂字深文高郵人知長洲縣官至司農卿國亡

士大夫居班行者隨例北上漵至莘縣乃不食而卒○志云邑人丙右博極群書工于詞賦仕至大令

清平縣

在府城北九十里

漢清陽縣地隋開皇初徙貝丘縣于此十六年改爲清平縣○唐王建詩註云宋氏五女貝州宋處士之女也曰若華若昭若倫若憲若茵其父老病五女誓不嫁以奉事之其詩曰五女誓終養貞孝內自持兕絲自縈紆不上青松枝晨昏在親傍閑則讀書詩素釵垂兩髦短窄古時衣行成聞四方徵詔環珮隨鄉中尚其風重爲脩茅茨○寰宇記云王莽河在縣南十八里○龍潭在縣西三十里潭濶畝餘深不可測流出十里注于漯川卽隋所置舊縣城也按宋元豐間漯河決遂移今理乃廢爲鎮○志云唐呂太常墓在縣界太常名才今失所在○後唐明宗陵在城內崑然高起猶存按縣舊割博平之靈明寨者明宗嘗駐兵于此後人因其高阜遂名爲陵五代史明宗葬于河南府東北不應在此

冠縣

在府西南百五十里

東昌府志卷之五
晉大夫冠氏邑隋置縣省清水縣入焉今清水鎮是○寰宇記云黃河在縣界俗謂之王壘屯氏河在縣東南衛河在縣西有吉固隄○水經注云白溝水又東北逕趙城西又北阿難河出焉蓋魏將阿難所導以利衡瀆首有阿難之稱矣白溝又東北逕空陵城西又北逕喬亭城西東去館陶縣故城十五里縣卽春秋所謂冠氏也左傳哀十五年晉人伐衛齊爲衛故伐晉冠氏則此邑矣○志云唐李棲筠調冠氏主簿太守李峴引爲布衣交不拘常禮至今以爲美談○邑人路巖咸通間同平章事有故宅存○恩公塔在城西高十三級唐恩公和尚造又城西元兒庄有仙姑冢相傳古仙女曹希蘊葬此○冉仲弓墓在縣北二十五里有祠○元杜公墓有學士張士觀碑文

臨清州

在府城西北一百二十里

領縣二

戰國趙東鄙也漢清淵縣水經云河水又東北過清淵晉末嘉元年太傅越使將苟晞擊破汲桑于東武陽桑退保清淵是也後魏太和中改臨清以臨清水而名 國朝弘治二年始陞州領館陶丘二縣○河紀云漱玉泉在州城內秀林亭在城外

程敏政詩雞犬深深曲逕通行行何必問西東井
 亭楊柳交加處木槿初開一樹紅○志云大阜在
 鎮定門連亘百餘畝隋臨清故城在今治西四十
 里宋建炎間徙州西南十里之曹仁鎮 國初又
 徙城北八里之臨清閘景泰間始易今治當汶河
 之北衛河之東按汶水自南旺分流至此漸微細
 沿途置閘啟閉極嚴經南板閘始與衛河合而西
 流漕舟至此謂之出口○鰲頭磯在城外延亘二
 十餘里汶衛合流一洲中峙自勝國來名曰中洲
 四閘分建于首尾萬貨鱗集薛瑄臨清曲云臨清

人家枕閘河臨清賈客何其多停舟落落無可語
 呼酒只對長年歌○耿貴人墓在衛河西岸十五
 里有大塚舊名其陵漢安帝母所塋也其下有池
 曰蓮花池○渡口在州北七十里其地為清河夏
 津之交吳寬渡口阻風詩云黃沙障天天半昏砲
 頭風急萬馬奔何人去塞土囊口天與河流一色
 渾曠野麥苗纔尺許只見風來不見雨雨師風伯
 不相能彼蒼高高奈何汝○金石錄云北齊臨清
 王假黃鉞碑今無考後魏路元帥墓在下四保淨
 土禪寺路自漢為清淵人南北朝仕宦鼎盛元帥

碑闕其名○唐大曆年臨清令權阜碑在舊州城
史載安祿山叛權阜詐死不入其黨高適表試大
理評事者也○元中丞蓋苗舊第斷碑猶存今名
蓋村州南親仁里有濮陽公墓卽其父諱謙贈濮
陽公中書令○國朝張瑤明律呂呂瑤精字學黃
堂通易數著皇極經世書解皆州人

館陶縣

在州西一百三十里

爾雅再成曰陶丘趙置館于其側漢縣之志云陶
丘在城西北七里微有土阜今爲鎮○衛河在城
西二里卽漢屯氏河也有白溝水出縣西十里隋

煬帝疏入屯氏河名永濟渠亦曰御河宋王安石
御河途中詩云燈火匆匆出館陶回看永濟日初
高○黃河在縣西南五十里水經注云大河故瀆
北出爲屯氏河逕館陶縣東北出漢書溝洫志
曰自塞宣防河復北決于館陶縣分爲屯氏河廣
深與大河等成帝之世河決館陶及東郡金堤上
使河堤謁者王延世塞之三十六日堤成詔以建
始五年爲河平元年以延世爲光祿大夫是水亦
斷屯氏故瀆水之又東北屯氏別河出焉○寰宇
記云屯氏河俗名毛河後周大象中置毛州于此

隋仁恩爲毛州刺史大業間廢按毛州城在縣西南四十里其地爲南館陶漢明帝封其妹爲館陶公主今有駙馬渡黃花臺皆其跡也○志云南北朝徐遵明者華陰人受業平原唐遷處之蠶室讀孝經論語尚書三禮不出門院六年知陽平館陶趙世業家有服氏春秋遂往讀之手集春秋章義三十卷○皇甫冉過館陶李丞所居詩盛名天下挹餘芳棄置終身不拜郎詞藻世傳平子賦園林人比鄭公鄉門前墜棄浮秋水籬外寒臯帶夕陽日夕青松成古木祇應來者爲心傷王安石發籬陶詩促轡數殘更似聞雞一鳴春風馬上夢沙路月中明笳鼓遠多思衣裘寒始輕稍知田父穩燈火閉柴荆熊卓題館陶主人壁詩山泉入戶流閑花自開謝此意堪誰語明月來庭下又杳杳竹林下青蘿向人長俗客不到門清風自來往○選舉志云杜驥館陶人國初歷交趾三江府同知征討有功

丘縣

在州西二百里

春秋晉乾侯地魯昭公客居于此漢初館陶縣之別鄉也後析置丘高祖以唐厲擊破項籍功封

于丘丘卽此地州志云平丘山在縣治東十字街
爾雅以爲非人爲之丘也有古栢在文廟內共四
十六株相傳唐宋間植老幹鬱盤黛色參天恍如
孔明廟前物○平恩故城在縣之程孟村春秋赤
狄地宣十五年晉林父敗狄于曲梁者也後齊盧
昌衡隋房恭懿皆爲平恩令有聲後省入當縣○
古黃河在縣東南衛河在縣南入館陶界漳河在
縣西有隄曰虞公隄○志云古塔二一在洪濟寺
內一在其東南○成湯廟在縣東南八里之段兒
寨有宋元舊碑○晉陸機贈斤丘令馮文羆詩昔
與二三子游息承華南摧翼同枝條翻飛各異尋
苟無凌風翮徘徊守故林慷慨誰爲感願言懷所
欽發軫清洛汭驅馬大河陰佇立望朔途悠悠迥
且分索深古所悲志士多苦心悲情臨川結苦言
隨風吟愧無離佩贈良訊代兼金夫子茂遠猷歎
誠寄惠音

高唐州 在府城東北一百二十里 領縣三

卽春秋襄十九年齊夙沙衛奔高唐以叛者杜註
高唐在祝阿縣西北是也漢縣之元至元中陞爲
州至今仍○水經云河水又東北過高唐界註曰

河水于縣深水注焉按深河在城西二里又十八

里爲馬頰河有堤曰爵堤俗呼其地爲馬灣○郡

國志云盼子墓在城東三十里史記齊威王曰吾

臣有盼子者使守高唐則趙人不敢漁于河卽大

河之故瀆也漢元帝年河決靈鳴犢口在今州南

三十里又熙河在東南三十里疑卽屯氏河也○

志云州城東北有玉岡謂之高唐山宋元豐間王

闢之調高唐令御史黃夷仲口占一絕謔之曰高

唐不是那高唐風物由來各異鄉若向此中望雲

雨只應愁殺楚襄王○圖經云魚丘山在州東其

狀似魚五代梁改魚丘縣以此今魚丘驛沿其名

○酉陽雜俎云高唐縣鳴石山巖高百餘仞人以

物扣之聲甚清越晉太康中逸士田宣隱于巖下

常拊石自娛每見一人著白單衣徘徊巖上及曉

方去宣後令人擊石于巖上潛伺俄然果來因遽

執袂詰之自言姓王字中倫衛人周宣王時入少

室山學道比頻適方壺去來經此愛此石響故輒

留聽宣乃求其養生惟留一石如雀卵遺之初則

凌空百餘步猶見漸漸煙霧障遂不見宣得石含

之輒百日不饑云○稽神錄云唐羅弘信徵時投



原件短缺

東昌府志卷之五
寄高唐田氏田氏撫愛如子遂冒姓田已令浚井
甫下忽龍自井出雷電交作田氏驚悸謂弘信已
爲井中泥矣頃之弘信突出神色自若田氏異之
禮待愈厚因從軍爲裨將後累官魏博節度使進
豫章郡王迎田氏于私第事如父母厥後尙田氏
像于龍井之上按志龍井堂在州北二十里○夢
溪筆談元豐間歐陽文忠公宿高唐館聞沙中車
馬人物之聲歷歷可辨時謂之高唐海市○志云
樓兒井在州城內西南隈水極清甘夏月久貯不
變境內又有寺前井菜園井皆不逮也未樂間

上鐸聲急板橋人過晨雞啼漁翁待旦掉船去白
鷗飛過黃蘆西鄭橋詩云鄭家橋下溪水流桃花
浪暖鮮鱗遊老翁棹船四五葉鳴榔舉網兼葭秋
大魚撥刺貯笊簍紫菱綠荇堆船頭歸來沽酒切
新鱸高歌醉卧蘆花洲濯清亭詩云劉侯亭子連
青冥雲來倏忽天飄傾蒼龍捲海半空落四簷瀑
布生秋聲煩囂洗滌毛骨爽朱簾暮捲山光明靜
軒題詠今不見一區瓦礫蒼苔生按濯清亭在同
樂館傍鄭橋亦見州志

恩縣

在州北
七十里

宋慶曆間貝州王則叛河北宣撫使文彥博平之
 赦其餘黨名爲恩州 國初降縣○貝州後周建
 德間置春秋莊公八年齊襄田于貝丘卽此寰宇
 記云貝丘高五丈周迴五十步後漢貝丘長劉伯
 言北海范孟興二碑文並磨滅存臨清清平縣界
 漢清河郡設此高祖封王吸爲侯國○志云西山
 在縣西四十里舊恩州城也洪武七年縣丞申範
 奉檄移之許官鎮卽今理所左傑西山晚眺詩云
 貝丘何迢迢靈山迴嶇嶇玄景停陰壑丹氣藹陽
 林蒼蒼秀瑤草唧唧亂鳴禽日夕多更佳賢達幾

登臨巘巘坐銷歇雲物杳深沉城郭嘆非古人烟
 嗟至今振策尋遺跡惻惻傷我心幸餘圖牒在悠
 然獲所欽○志云白馬營在縣西十五里爲唐時
 故鎮○漳南鎮在縣西北四望坦平中有高阜環
 水卽漳水也隋置縣至元廢唐書劉黑闥起兵漳
 南卽此地矣○馬頰河在縣東南津期河在縣南
 二十里卽舊永濟渠也溢涸無常舟楫時待津焉
 又縣西北五十里之傍有古槐一株相傳昔有四
 女不嫁同植此樹名四女樹○劉玄德廟在縣拱
 辰門外元大定間有碑蓋玄德曾爲高唐尉故祀

之○攷宋史仁宗慶曆七年十一月貝州賊王則據城反以明鎬爲河北安撫使則涿州人初以歲饑流至貝州自賣爲人牧羊後隸宣毅軍爲小校貝冀俗尚妖幻相與習爲五龍滴淚等經及諸圖識書言釋迦佛衰謝彌勒佛當持世則之與毋訣也嘗刺福字于背以爲記妖人因妄傳背字隱起爭信事之州吏張蠻卜吉主其謀黨與連德齊諸州約以明年正旦斷澶州浮梁作亂會其黨以書詣北京留守賈昌朝事覺被執則故不待期亟以冬至日反時知州張得一方與官屬謁天靈觀則

率其從劫庫兵執得一囚之從通判董元亨索庫鑰元亨厲聲罵賊賊遂殺之又殺司理王獎等兵馬都監田斌以從卒巷戰不勝而出城扉闔提點刑獄田京等縋城出保南關入驍捷營撫士卒凡有欲應賊者京以計盡誅之由是營兵在外者皆懾服南關得不陷則潛稱東平王國曰安陽年號曰德勝旗幟號令皆以佛爲稱城以一樓爲一州書州名補其徒爲知州每面置一總管然縋城下者日衆于是令民伍伍爲保一人總餘悉斬事聞以知開封府明鎬爲體量安撫使而詔貝州有能

獲賊者授諸衛上將軍鎬至日州民汪文慶自城上繫書射鎬帳約爲內應夜垂緹以引官軍入城者數百人賊覺率衆拒戰官軍不利乃與文慶等復絕而出鎬以貝州城峻不可攻乃爲距圍將成爲賊所焚鎬乃卽南爲地道日攻其北以牽制之八年春正月朝廷以則未下乃命文彥博爲河北宣撫使鎬爲之副夏竦惡鎬恐其成功凡鎬所奏輒從中阻之彥博旣受命請軍事得專行許之彥博至貝鎬穿道適通遂選壯士夜半由地道入城衆登城賊縱火牛官軍以槍中牛鼻牛還攻之賊大清開東門遁總管王信追則擒之餘衆保村舍者皆被焚死竦復言所獲恐非真盜乃詔檻送則京師磔于市賊據城凡六十六日而敗改貝州爲恩州焉外史氏曰廣寧之變雖有孫得功謀叛而城中人士欲應賊與不應賊者尚持半堂撫臣何至棄城而遁其計反出貝州提點刑獄田京下乎宜媿死矣

夏津縣

在州西五十里

漢鄒縣高后封呂佗爲鄒侯亦田蚡之奉邑也史記田蚡因食邑在鄒不塞決河是矣隋改夏津○

按封建表藥布梁人孝文時以功封鄒侯初布與彭越遊甚善越爲梁王請布爲大夫越誅詔曰有敢收視者捕之布竟哭尸下及布死燕齊之間皆爲布立社號曰藥公社○寰宇記云屯氏河在縣北馬頰河在縣南潤河枯瀆在縣東三十六里春秋齊晉會盟之要津也縣以此名○志云新縣店卽孫生鎮在縣西北三十里隋開皇間改置夏津于此唐罹水患徙今治○彌陀廢塔卽資福寺塔也我弘治間掘有石槨金棺水晶石瓶藏舍利七粒刻太平興國八年定光佛舍利記○迎薰門外古井距觀音寺東北七十餘步相傳唐武德九年建寺時甃尚存

武城縣

在州西北一百二十里

趙平原君之封邑漢置東武城縣以定襄有武城故加東也晉曰武城○統志云絃歌臺在縣西十里御河北岸高九尺上有子游祠按子游宰武城在兗州府屬費縣西北不應在此○水經注云清河又東北逕陵鄉西應劭曰東武城西南七十里有陵鄉故縣後漢封太僕梁松爲侯國故世謂之梁侯城也清河又東北逕東武城故縣城西史記

趙公子勝以解邯鄲之功受封于此清河又東北
 逕復陽縣故城西漢高祖七年封右司馬陳胥為
 侯國王莽更名之曰樂歲地理風俗記曰東武城
 西北三十里有復陽亭故縣○志云一字河在縣
 西小橋沙河在縣東南十五里又西北五里曰蔡
 河又西北二十里曰黃蘆河又西北四十里曰五
 溝河○隋書云武城崔儵與頓丘李若齊名一時
 稱重故為之語曰京師灼灼崔儵李若新唐書載
 鄆邠鄆群皆兄弟行舉進士按今有崔家集相
 傳文廟前是崔群墓○志云孫伏伽墓在縣東北

三十里○元程思溫墓在縣境國子監虞集銘

濮州 在府城西 南二百里 領縣三

晉之濮陽郡也漢武帝元封中以皇子允為濮陽
 王于此有南北濮水水經注云濮水又東分為三
 瀆昔師延為紂作靡靡之樂紂滅師延投入于此
 水矣○郡國志云古昆吾之舊壤顓頊遺墟故曰
 帝丘亦曰高丘春秋屬衛僖三十一年衛遷都于
 帝丘者也莊十四年齊桓公會諸侯于鄆註云鄆
 衛地戰國屬齊威王九年趙伐我取鄆是矣漢為
 鄆縣魏文帝以臨淄侯曹植為鄆城侯故城在

州東二十里按隋時濮陽屬東郡鄆城屬鄆州所
理不同至唐乾元始以濮州理鄆城 國朝仍省
入○志云濮陽故城在州東南二十里有會臺即
齊桓公再會于鄆處舊城東北有陳臺相傳曹子
建築又謂之愁臺 國朝景泰二年以河患移治
王村乃今理也○援神契曰舜生于姚墟應劭曰
姚墟與雷澤相近山海經云雷澤有雷神龍首人
頰鼓其腹則雷河圖曰巨人跡出雷澤華胥履之
而生伏羲焉志云雷澤故城在州東南一百里今
為雷澤鎮史記舜漁于雷澤耕于歷山鄭玄曰歷

山在河東應劭以為即雷澤中皇甫謐以在濟陽
與雷澤相次郡志以歷山在州東南七十里雷澤
中有小山孤立峻上亭亭傑峙謂之歷山舊有再
熟成都二鄉○寰宇記云雷澤本漢鄆陽縣地周
武王封弟季戴為侯國說苑孔子行于鄆之野見
榮啟期被索而歌三樂即此處也○述征記云鄆
陽東南有堯母慶都之墓上有堯母祠繞墓有池
池魚頭間生印謂之印頰魚集古錄云堯陵在雷
澤縣西三里自堯即位至末嘉三年二千七百二
十一年記于碑唐貞觀中有詔禁芻牧春秋莫醑

又有中山夫人廟在陵西五十步即堯之四妃也
○重璧臺在故雷澤界穆天子傳天子遊至河濟
盛君獻女爲造重璧臺以處之是也□郡國志仲
山甫墓在雷澤西北一里墓前祠堂石室儼然若
新○臨濮故城在州南七十里其地有清丘高五
丈春秋宣十二年晉人宋人衛人曹人同盟于清
丘杜預注云在濮陽東南按水經注瓠子河出東
郡濮陽縣北河北十里卽瓠河口也禹貢雷夏既
澤灘沮會同爾雅曰水自河出爲灘許慎曰灘者
河灘水也暨漢元光之年河水南決漂害居民哉

帝元封二年上使汲仁郭昌發卒數萬人塞瓠子
于是上自萬里沙還臨決河沈白馬玉璧令群臣
將軍以下皆負薪填決上悼功之不成乃作歌曰
瓠子決兮將奈何殫爲河兮地不寧功無已時兮
吾山平吾山平兮巨野溢魚沸鬱兮柏冬日正道
弛兮離常流蛟龍騁兮放遠遊歸舊川兮神哉沛
不封禪兮安知外皇謂河伯兮何不仁泛濫不止
兮愁吾人齧桑浮兮淮泗滿兮不返兮水惟緩一
日河湯湯兮激潺湲北渡迴兮迅流難塞長菱兮
美玉墮竹林兮楫石菑宣防塞兮萬福來于是

卒塞瓠子口築宮于其上名曰宣房宮故亦謂瓠子堰爲宣房堰焉平帝已後未及脩理河水東浸日月彌廣永平十二年顯宗詔樂浪人王景治渠築隄起自滎陽東至千乘一千餘里景乃防遏衝要疏決壅積瓠子之水絕而不通惟溝瀆存耳河水舊東河逕濮陽城東北故衛也帝顓頊之墟昔顓頊自窮桑徙此號曰商丘或謂之帝丘本陶唐氏火正闕伯之所居亦夏伯昆吾之故都也殷之相又都之故春秋傳曰闕伯居商丘相土因之衛成公自楚丘遷焉秦始皇徙衛君角于野王置東

郡治濮陽縣濮水逕其南故曰濮陽也沛公軍濮陽環之以水張晏曰依河水自固近鹹陽僖十三年夏會于鹹杜預曰東郡濮陽郡有咸城者也瓠子故瀆又東逕桃城南傳曰分曹地自洮盡曹地也今鄆城西南五十里有桃城或謂之洮矣瓠瀆又東南逕清丘北宣十二年經書楚滅蕭晉人宋衛曹同盟于清丘京相璠曰在今東郡濮陽縣東南三十里魏都尉治○瓠河又左逕雷澤北其澤數在大城陽縣故城西北一十餘里昔華胥履大蹟于此其陂東西二十餘里南北一十五里舜所

漁也澤之東南卽成陽縣史記武王封弟季戴于成應劭曰其後乃遷于成之陽故曰成陽地理志曰成陽有堯冢靈臺今成陽城西二里有堯陵陵南一里有堯母慶都陵于城爲西南稱曰靈都鄉曰崇仁邑號脩義皆立廟四周列水潭而不流水澤通泉冬無耗竭至豐魚筍不敢採捕前並列碑石枯栢數株檀馬成林二陵南北列馳道逕通堯陵東城西五十餘步中山夫人祠堯妃也石壁階墀仍舊南西北三面長櫟聯蔭扶疎里餘祠南有仲山甫冢冢西有石廟羊虎傾低破碎畧盡于城

爲西南在靈臺之東北□金石錄云堯碑漢建寧四年五月成陽令管遵立又堯陵北仲山甫墓南有伍員祠晉太安中建有一碑永興中立又云成陽靈臺碑漢建寧五年立成陽令唐君頌碑光緒六年立廷尉仲定碑熹平元年立○注漢書應劭曰濮水發源陳留入于鉅野通畧云濮水自酸棗縣傍河東北過濮陽在今州東南三十里南華經莊子臨濮而釣卽此地也有釣臺今名蒲汀俗訛以爲嚴光釣臺非是○瓠子河以形似而名發源魏郡白馬此其下流也在州東南七十里據酈道

元以卽河水所及入者志云黃河自州治東南三十里合瓠子河東北流入于會通河又有新黃河入焉 國朝正統十三年河決于滎澤東黑洋山由蒲經澶四十餘里合黃河故道北入會通河○青山在州城東三十里山今已夷其下為青山峒居民依焉東北岡阜連屬其曰杏花岡者昔人嘗于此種杏遊賞競集故名曰項城阜者相傳卽劉項相持之處史記秦二世元年項梁破章邯于東阿追至濮陽大破之因以此為項城阜○胡柳陂在州東北二十里土阜相連五代史云後唐莊宗

與梁軍戰于胡柳陂周德威死之晉王收軍復戰大破之卽此地理志曰胡柳陂濮陽地名去陂西十里有馬軍寨土人訛其名為黃柳陂云○唐高適同群公登濮陽聖佛寺閣詩落日登臨處悠然意不窮佛因初地識人覺四天空來鴈清霜後孤帆遠樹中徘徊傷寓目蕭索對寒風王維寄濮陽崔季重詩秋色有佳興况君池上閒悠悠西林下自識門前山千里橫黛色數峯出雲間嗟峨對秦國合沓藏荆關殘雨斜日照夕嵐飛鳥還故人今尚爾嘆息此頽顏李群玉與濮陽夏侯吳三山人

夜話云靜談雲壑趣高會兩三賢酒思彈琴夜茶
芳向火天兔裘堆膝暖鳩杖倚牀偏各厭池籠窄
相着意浩然○州人李先芳伯承有別業在會臺
西南海內名賢多所題詠伯承能詩在隆萬間與
濟南李攀龍同郡謝榛稱七子

范縣

在州東北
六十里

晉士會之邑漢爲縣曰范氏從其姓也孟子自范
之齊卽此○水經云瓠子河又北過東郡范縣東
北爲濟渠與將渠合酈道元註瓠河自運城東北
逕范縣與濟濊故渠合故渠上承濟濊于乘氏縣

北逕范縣左納瓠濊故經有濟渠之稱又北與將
渠受河于范縣西北東南逕秦亭南春秋莊三十
二年書築臺于秦杜預釋地云范縣西北有秦亭
也又東南逕范縣故城南王莽之建睦矣漢興平
中靳允爲范令曹太祖東征陶謙于徐州張邈迎
呂布郡縣響應程昱說允曰君必固范我守東阿
者也將渠又東會濟渠北逕范城東瓠河之北卽
廩丘縣也王隱晉書地道記曰廩丘者春秋之所
謂齊邑矣實表東海者也竹書晉烈公十一年田
悼子卒田布殺其大夫公孫遜遜以廩丘叛于趙

是也瓠河與濮水俱東流經所謂過廩丘爲濮水
矣縣南瓠北有羊角城魯襄公二十六年傳曰取
晉羊角遂襲我高魚天大雨自竇入介其庫登其
城尅而取之註疏今廩丘縣所治廩丘東北有故
高魚城俗謂之交魚城○志云范士會墓在縣東
三里舊城在東南二十五里隋時築 國初河決
徙今治○廩丘城卽縣之義東保春秋齊烏餘以
廩丘叛三國志曹魏移兗州于廩丘皆此地也晉
地里志云廩丘有春秋時羊角城亦曰義城以左
桃羊角哀名○魯西門在縣東北四十里舊有石

門高數尺舊記云此魯衛之郊也顧城在縣東五
十里毛詩韋顧旣伐昆吾夏桀註云三國黨于桀
故伐之矣張直宿顧城詩綠草展青桐樾影連春
樹茆屋八九家農器六七具主人有好懷寒衣留
我住春酒新潑醅香美連糟漉一醉卧花陰明朝
送君去按直五代時當縣人有墓在城南五十里
史稱篤孝行通經術號逍遙先生○元范括過廩
丘詩一葉輕舟穩飄飄過廩丘櫓聲搖夜月漁火
對殘秋古跡中都近風波昭代憂蘆花深處聽款
乃幾曾休郭夢起過羊角城烈士昔曾寓仍高別

代名燕臺亡駿馬淮海渡奔鯨併食良爲拙思賢
恨未平城頭孤月在清夜對霜明○志云卧牛山
在舊范縣西北三里鳳凰嶺在縣南三十里俱以
形似而名○大潞潭在縣東南卽鉅野也水保河
自開州來逕濮陽舊城入縣之竹口○閔損祠在
衛河東南○范縣舊驛在尹鎮堡宋宣和中豫章
李侗記

觀城縣

在州西北七十五里

國語註曰觀國夏啟子太康之弟所封在衛縣漢
置縣曰畔觀後漢改畔觀爲衛國隋開皇中改衛

國爲觀城

○水經云浮水故瀆又東逕衛國邑註

曰城北故衛公國漢光武以封周後浮水又東逕

衛國縣故城南古樹觀應劭曰夏有觀扈卽此城

也竹書梁惠成王二年齊田壽率師伐趙圍觀觀

降浮水故瀆又東逕河牧城而東北出郡國志曰

衛國姚姓有河牧城矣○寰宇記云敦丘在縣南

二十里爾雅一成爲敦丘卽此又十里爲瓦屋城

春秋隱八年會于瓦屋者也又三十里有牧鶴池

相傳衛懿公養鶴處○新臺在縣東南八十五里

毛詩序云新臺刺宣公也納伋之妻作新臺于河

上而要之焉今在盧津關一名高陵關屬故臨黃
 縣界按臨黃漢縣以北臨黃溝而名溝水西自古
 澶州界流入側有山支水出焉東南入虎掌溝○
 志云古龍潭在縣東南有龍淵宮漢武帝河決時
 築相傳漢文帝后竇氏父微時嘗釣魚墜此淵死
 故有青山冢在縣南八里○唐劉祥道墓在縣東
 十五里薛家屯祥道歷官金紫光祿大夫○五代
 周郭雀墓在縣北城下雀先為大名節度使○魏
 長賢墓在故臨黃縣南十五里唐貞觀七年追贈
 定州刺史即魏徵父也○宋畢士安墓在縣西南
 二里士安為吏部侍郎同平章事○元奉議大夫
 王國賓墓在縣東二里趙孟頫銘○選舉表邑人
 張祚為三河興平教授以淹博稱纂古今雜著等
 書

朝城縣 在州北九十里


衛之東鄙也漢設東武陽郡于此志云武河在縣
 城東十步是矣其後為縣唐永昌中改曰武聖開
 元十年以縣東有古朝城因改今名○寰宇記云
 二賢祠在縣治內祀後漢東郡守臧洪及司馬陳
 容也洪為袁紹所害容奮而起曰仁義豈有常蹈

之則爲君子背之則爲小人紹亦害之故後並祠
焉○志云馬頰河在縣西北金蓮陂在縣西寧國
寺前卽瀑水之源也以其種蓮花皆黃色故名又
縣北于家舖東南有二大陂爲武水發源處今涸
邑人謝註有武水脩楔序典雅流麗酷似六朝○
冠石山在縣東南連亘百餘里○扁鵲墓在縣西
與石燕井相近井在寧國寺前相傳陰雨時有石
燕飛出○隋田真宅在西北七十里 國朝宣德
二年田氏孫昇重建○德星堂在縣界唐宣宗以
崔鄴一門孝友因賜此名○選舉表邑人張瓚以

明經任六安州判工詩文守官疆直不屈

白雲山房入卷之五

五





書

